

ODRŽAN „XXII INCOSAI 2016“ KONGRES MEĐUNARODNE ORGANIZACIJE VRHOVNIH REVIZIJSKIH INSTITUCIJA



U periodu od 05.-11.12.2016. održan je „XXII INCOSAI 2016“ Kongres Međunarodne organizacije vrhovnih revizijskih institucija (INTOSAI) u Abu Dabiju, Ujedinjeni Arapski Emirati, na kojem je prisustvovao generalni revizor Ureda za reviziju institucija u FBiH.

Na Kongresu je učestvovalo više od 160 zemalja članica INTOSAI-a, kao i predstavnici međunarodnih donatorskih i partnerskih organizacija. Kongres je jedinstvena prilika da se na jednom mjestu razmjene iskustva, diskutuje o aktuelnim temama, te usvoje odluke i daju preporuke za unaprjeđenje odgovornosti vlada širom svijeta. Tako je generalni revizor iskoristio priliku da pruži svoj doprinos Kongresu, te ostvari kontakte i ojača saradnju kako sa domaćinima Kongresa, tako i sa predstavnicima drugih vrhovnih revizorskih institucija, a posebno iz zemalja u regionu.

Glavne teme Kongresa, a koje se vežu za ciklus strateškog planiranja, su bile:

- Kako INTOSAI može doprinijeti „UN Agendi 2030. za održivi razvoj“, uključujući dobro upravljanje i jačanje borbe protiv korupcije?
- Profesionalizacija: šta može promovisati kredibilitet INTOSAI-a kako bi postala istaknutija međunarodna organizacija?

Tokom Kongresa je prezentovan i usvojen strateški plan INTOSAI-a za period 2017.-2022., izrađen u procesu inkluzivnih konsultacija s vrhovnim revizijskim institucijama. Isti sadrži četiri strateška cilja posvećena:

- Razvoju profesionalnih standarda
- Razvoju kapaciteta
- Razmjeni znanja i
- Povećanju uticaja i vrijednosti INTOSAI organizacije kao međunarodne organizacije.

Prioriteti usvojenog INTOSAI Strateškog plana se odnose na:

- Zalaganja INTOSAI organizacije za osiguranje nezavisnosti vrhovnih revizorskih institucija
- Pružanja doprinosa praćenju i pregledu realizacije ciljeva održivog razvoja
- Realizaciju UN-ove Agende 2030.

Od posebnog značaja za Ured za reviziju institucija u FBiH je usvajanje niza unaprjeđenih standarda vrhovnih revizorskih institucija (ISSAI standarda) i smjernica za dobro upravljanje (INTOSAI Gov) i to za: reviziju usklađenosti, reviziju učinka, reviziju međunarodnih organizacija, IT reviziju, reviziju informacionih sistema za upravljanje javnim dugom, reviziju prevencije korupcije, smjernice za kolegijalne preglede, paralelne revizije, poboljšanje dobrog upravljanja javnom imovinom, principi za angažman eksterne revizije za međunarodne institucije, smjernice za evaluaciju javnih politika kao i standard za Etički kodeks. Na Kongresu se također govorilo o primjeni Okvira za mjerenje učinka vrhovnih revizorskih institucija („SAI PMF“) koji će poslužiti vrhovnim revizorskim institucijama da ocjenjuju svoj rad i razvijaju svoje kapacitete.